



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir_yimiyim




tir yimiyim

TAPAK 7

Arvind Kejriwal-i anogo ana tsungda Delhi CM mapa toktsütsü

CIA-i Venezuela tir tepsettsü tasa yanglu ta aitsüba US-i magizüker



VOL. XXI ISSUE NO. 334 (ADOK 334) DIMAPUR TENTONÜ (MONDAY) RONGJUI (SEPTEMBER) 16, 2024 ₹ 5.00

Küm 5 nung taila visa 5,000 shi ayok

New Delhi, September 15, 2024 (Agencies): September 2, 2024 nü Haryana nungi Sandeep ta ser nisung ka taila Swedish visa bener Italy-i aotsü lia Delhi airport nung apu.

Sandeep dang asungdanya asudang par yimtsung nungi nisung aika taila visas bener bendangleni aoba pai ashi.

Sandeep-i ashiba nung ajemdaker bushisungdanga arudang Delhi nung tesüba küm 5 tashi taila visa agütsüba maparen ka putetogo. Iba telok ajanga taila visa meyrjang pezü nungi pungu tsungda yangluogo aser Rs 300 crore ajanzükogo.

Asif Ali ta ser agent ka nem Rs 10 lakh agütsüba sülen taila visa angu ta Sandeep-i ashi. Iba nung ajemdaker police-i Asif Ali aser pa den yaritepertem Shiva Gautam o Naveen Rana na apu.

Parnok dang asungdanya asudang Shiva Gautam-i iba telok nung agent ana- Balbir Singh o Jaswinder Singh na tenung ashiba sülen tena apu.

Delhi kübok Tilak Nagar area

nung Manoj Monga ta ser nisung kati linük aika atema taila visa yanglu ta parnokisa ashi.

Police-i Tilak Nagar mita aodang Manoj Monga apu aser pa ya graphic design nung diploma angur ka lir.

Küm pungu tejakdang pai Jaideep Singh ta ser nisung ka ajuru aser Singh-i pa dang graphic designing skills amshia taila visa yanglutsü ajungmeso ta Manoj-i ashi.

Iba telok yagi ita shia taila visa 30-60 tashi yanglu aser minute 20 nung visa sticker ka yanglutet. Parnoki visa shia Rs 8-10 lakh agi yokdok aser parnoki tongteprateptsü atema Telegram, Signal o WhatsApp amshi.

"Tang tashi nung nisung trok puogo aser Nepali passports 16, Indian passports 2, visa stickers 30 aser visa stamps 23 ngutetogo. Onoki mita aodang dye machines, printers, laminating sheets, laptops, UV machines amala osettem aika nguogo" ta Deputy Commissioner of Police, IGI

Airport Usha Rangrani-i ashi.

Manipur tensa tamajungba akümer

Imphal, September 15, 2024 (Agencies): Manipur tensa mejungi akümba atema state sorkari district aika nung internet aser mobile data services shibangtsü mapang atsülangogo.

Imphal West, Imphal East, Thoubal, Bishnupur aser Kakching nung security tensa asadangba sülen iba lemtet agiogo.

Manipur sorkari September 10, 2024 nungi internet aser mobile data services shibangtsü tenzük aser tanü September 20, 2024 tashi atsülangba metetdaksüogo.

September 12, 2024 nü broadband services salaba osang metetdaksü saka tensa majungba agi sorkari public safety nung ajemdaker internet services teimba ka noktangba metetdaksüogo.

Külen, Manipur Police-i Deobarnü tensa tamajungba küma aoba osang ka metetdaksüogo.

"Lungkak aitertemi security dak tenük yoka prangpong tajungtem amshir. Khabeisoi aser Kakwa nung police dak automatic weapons agi khaloktsü" ta DIG N Herojit Singh-i ashi.

Tesüba nung lungkak aitba ama masü saka tangbo lendong ajurutsüba mapa inyaker. Police-i akokba tashi aremzüka inyaka arur anungji lungkak aitertemi ozüngi melaba ama shilem agitsü ayongzük, ta DIG Singh-i ashi.

Tawa lungkak aitba sentongtem nung non-local nisungtemi shilem agiba nguogo. Public kiojen raksatsüba aser lendong ataloktsü ana nung aliba tesemtemi aoterem dak police-i "anti-riot actions" inyaksü ta paisa ashi.

"Ozüng amertem ya nenok tsükchir masü saka loktiliba nung külemi shilem agirtem lir anungji police dak tenük yoka lungkak aitba anentsüla" ta DIG Singh-isa public dang shiogo.

Deobarnü Delhi Meetei Coordinating Committee (DMCC) den Coordinating Committee on Manipur Integrity (COCOMI), Meitei Alliance aser Global Manipur Federation (GMF) ajanga Jantar Mantar nung lungkak aitba sentong ka agiogo.

Parnoki Manipur nung ita 15 tashi mepetmesüa aruba anentsü aser Prime Minister Narendra Modi-i Manipur putiotsü aser sobaliba kümzüka ayutsü atema mapa inyaksü ayongzükogo.

DMCC-i Prime Minister nem memorandum ka agütsüba nung Kuki bunkers ajak raksatsütsü, appeasement policy anentsü aser yimjung den külemi liyonga aotsü tensa arudaksütsü takhangba agütsü.

DMCC-isa security agencies ajanga tejak repranga mapa inyakba bushisungdangtsü aser kin o kin tsungda temulung lemteptsüba mapa inyaksü ayongzükogo.

Centre-i 'One Nation, One Election' mapa tenzüktsü akok

New Delhi, September 15, 2024 (Agencies): Parliament nung "One Country One Election" atema jembia arur aser iba ya tan Narendra Modi'er sorkar kümsük nung mapa tenzüktsü ta osang angazüker.

Prime Minister Narendra Modi-i taküm Independence Day onük jembidang iba ya shiogo aser sorkari iba mapa inyaksü tenangzükba lir ta pai metetdaksü.

Centre sorkari taoba President Ramnath Kovind menden ser iba atema Committee ka tentet aser parnoki report agütsüogo.

Lok Sabha aser state assembly elections külemi agibaji mezüngbuba mera asütsü aser iba sülen anogo 100 tsungda local body elections agitsü ta Committee report nung shia lir.

Law Commission-i iba mapa tenzükba aotsü atema kobi melii sangdong ka agütsütsü ama ajitetet. 2029 küm nungi tenzük Lok Sabha, state assembly aser local body election ajak mapang ka nung külemi agitsü aser "hung house" mesüra "no-confidence motion" amala ajurudang unity government akümtsü atema latettsü akok.

Taoba ita Independence Day onük jembidang PM Modi-i "One nation, one election" atema tayongzükba agütsü.

"Mapang shia elections agiba ajanga linük tejakleni aoba nung tetsükdaksü ajurur. Linüki 'one nation, one election' agizüktsüla" ta Modi-i ashi.

BJP-ia parnok manifesto nung "One Nation One Election" nangzükba liasü aser sorkar osang

ajanga angazükba agi party ajaki iba ya agizüktsü teimla lir.

Ajisüaka, Opposition-ibo "One Nation One Election" magizükba metetdaksüogo aser iba ya temzüng alema lir ta parnoki ashir.

Sorkar ketdangsubaren nung timtem melii iba mapa inyaksüla aser kasa mapang nung state ajak nung sorkar akümtsüba nung timtem lir ta opposition-i ashir.

Lok Sabha election agiba tiyalong nung voters den tebilembatem lemsatepba nung tetsükdaksü ajurutsü ta regional party temia ashir.

Ano, tebilemstü kaji electronic voting machines (EVMs) aliba nung sen endokba asütsü. Küm 15 shia EVMs aliba nung Rs. 10,000 crore endoktsü ta ECI-i metetdaksüogo.

Delhi CM Arvind Kejriwal melenzüktsüpurtem



New Delhi, September 15, 2024 (Agencies): Arvind Kejriwal-i Deobarnü anogo ana sülen Delhi Chief Minister menden toktsütsü ta osang metetdaksüogo.

Nübertemi pa nem ochishiba kulikaket ka agütsüba sülen ang Chief Minister inyaksü ta pai ashi.

Aam Aadmi Party (AAP) lennirtem aser züngsemtem den jembidang Deputy Chief Minister Manish Sisodia-i pa menden memelenzüktsü ta jangjatsüogo.

"Nübertemi küna ochishir ta ashiba sülen ni aser Sisodia nati pei menden nung amentsü" ta Kejriwal-i ashi.

Delhi liquor policy ken o nung Supreme Court-i Hokolbarnü Arvind Kejriwal bail nung chiochtsü temelaba agüja liasü.

Tihar Jail nung ita trok jungnüa ayuba sülen pa chiok saka bail conditions nung pai official files nung sign masütsü aser chief minister office-i maotsü lateta lir.

Külen, Manish Sisodia-a ita 17 tashi tepuokdak ayuba sülen bail nung chioka lir.

Kejriwal-i kanga ajungbena chief minister menden yutsüba sülen tsünglanglen agüja alirtemi pa melenzüktsü akok ta bilemer.

ATISHI: Enforcement Directorate (ED)-i taküm March 21 nü Arvind Kejriwal apuba sülen AAP lennirtem rongnung Atishi-i tongti shilem agia aruogo.

Kejriwal apuba sülen lai Delhi sorkar ketdangsuba nung tongti

shilem agia arur aser department 14 repranger. Cabinet minister tem rongnung Atishi-i mapa teimba bena lir aser lai Education, Finance, Planning, PWD, Water, Power & Public Relations amala tongtipang department ketdangsuba arur.

Atishi-isa Delhi Assembly nung standing committee on education chairperson inyakogo aser la dak o jembitsü sempet aliba ajanga chief minister inyaksüpurtem rongnung pa ka lir.

GOPAL RAI: Arishi küm 49 tain Gopal Rai ya AAP sasep nung teküpoktiba jenjang nung inyaker aser aika ajangshia aruba nisung ka lir. Pa ya student activism nung shilem tajung agir ka lir aser Delhi yimtenren mapa nung tongti shilem agir.

Rai ya Environment, Forest and wildlife, Development aser General Administration Department atema Cabinet Minister lir. Gopal Rai-i Delhi nung working-class communities den tesentaktep tajung lir aser Delhi nung pollution control nungi labour welfare tebilemstü atema pai inyaka aruba ajanga chief minister inyaksü nübotem rongnung pa züngsem.

KAILASH GAHLOT: Kailash Gahlot ya Delhi yimtenren wadang nung tongtipang nisung ka lir aser pai Transport Minister ka ama mapa tajung aika inyakogo. Pa lenisüba kübok Delhi sorkari transport infrastructure kanga

tajungba kümdaksüogo. Arishi küm 50 tain Gahlot ya AAP nung lennir tejentem rongnung ka lir aser pa dak ketdangsuba sempet tajung aliba ajanga Chief Minister akümtsüpurtem rongnung pa densemer.

SUNITA KEJRIWAL: Kejriwal kinungtsü Sunita Kejriwal ya taoba Indian Revenue Services (IRS) officer ka lir aser lai küm 20 tashi Income Tax Department nung inyaka aruogo.

Delhi, Haryana aser Gujarat Lok Sabha atema nüboyimjang lai tongtipang shilem agiogo.

Lai mapang shia osangbener sendentem nung jembia aser Arvind Kejriwal-i züluba shiditem zünga metetdaksü.

Delhi aser Ranchi nung Opposition INDIA bloc sentongtem nunga lai shilem agia aru aser mapang shia BJP-i la kinungbo anema inyakba atema aija aru.

Tesüba nung sorkar ketdangsuba asüba agi Sunita Kejriwal-i sorkar ketdangsubaren kanga junga meteta lir. Ajisüaka la non-political background nungi asüba den ano temzüng dak sendakba onük kar ajanga Chief Minister akümtsü asoshi tetsükdaksü kar lir.

Sunita Kejriwal ya AAP züngsem ka masü anungji lai mezüng party nung adentsüla aser lai tang chief minister kümra, ita asem tsungda election nung toktepa MLA akümtsüla.

Tang Delhi yimtenren tensa aser ano February 2025 nung Assembly elections agitsü aliba ajanga Election Commission-i tangbo by-election agitsü asoshi tayongzükba aika ajurutsü ama bilemer.

Sunita Kejriwal-i chief minister inyakra opposition-i AAP ya kibong kati aniba telok ta aitsütsü anungji AAP atema iba tebilemstü lir.

Sungratsu nung Keyi Meta monument semzük



Dimapur, Rongjui/Sept. 15 (TYO): "Sungratsu Keyi Meta - Platform for Slain Tigers" nüngja agütsür monument tasen ka Sungratsu yimdak September 12, 2024 nü semzük.

Yimtsüng nung akhi mapang kiset shiruru chitsüba mechi keyi tepsetba yimya bilemteta iba sapang ya yanglua liasü. Sungratsu nüburtem asoshi keyi tepsetba ya tasü tait, konang aser tebourchi temaitsü liasü.

Iba monument ya taoba Nagaland Legislative Assembly (NLA) Speaker aser MLA, asür Dr. Imtiwapang Aier kinungtsü Kiehungle-i semzüksü aser I. Kilen Longchar, Pastor, Sungratsu Baptist Arogo ajanga meshiteta sarasademja liasü.

Iba monument ya yimtsüngi aitba süngkum anasa lir, kong akhi mapang keyi tepseter metaa ayu.

Sungratsu Village Council Chairman, M. Taka Longchar-iba sentong nung akhi mapang bilemteta jembidang, keyi yagi yimdaklir bo kata metepset, saka teti kiset shiruru chitsüba ajanga mapang shia keyi asatsüsa akum, ta ashi.

Keyi tepsetba sülen yimdaklir temi benjongtema keyi tasüji bener oa süngkum anasa sapang ka nung shizüka yoka ayu.

Sungratsu nübur temi iba monument ya mapang talangka nungi aginüa liasü, saka senotsü peria maliba ajanga yanglutsü mapang agi. Iba monument asangsang akumtsü atema asür Dr. Imtiwapang Aier aser par kibongi yariba atema M. Taka Longchar-i tenüngsang agüja liasü.

Kiehungle-i iba sentong nung jembidang iba project nung

shilem agir nem tenüngsang agütsü aser la kinungboi yimtsüng terenlok asoshi bendanga agütsür inyakba bilemteta jembia liasü.

Keyi Meta-Construction Committee convener, C. Wati Walling-i yimtsüng nung akhi mapang keyi asaba otsü lemsatepa liasü.

Otsü aika samaogo saka 18th century mapang nungi iba yimya ya amshia arur 1972 nung anen, ta pai ashi.

Paisa Sungratsu aser Keyi otsü nüngja agütsür kaket ka sayaba sangdonga liasü, kong keyi asaba otsütem zülua lir.

Tongtipang tatalokba kaji 1970 küm October ita khen nungi keyi 12 asaba indang iba kaket nung shia lir aser iba anogo semzükba nung yanglua aliba ya October 17, 1972 nü keyi asaba bilemteta yanglu, ta ashi.

Assam sorkari group 3 recruitment exam takok ngua agiogo

Guwahati, Rongjui/Sept. 15 (Agencies): Security kanga sashia yur Assam Direct Recruitment Examination (ADRE) takok ngua agitetogo.

Iba tatidang ya Assam sorkar department balala nung Group-III post tazüng aliba atema Deobarnü agia liasü.

Iba tatidang ochishia agitsü mechi state sorkari mera balala agia liasü.

Ghonda asem tatidang ya anepdang 10:30 ako nungi nikongdang 1:30 ako tashi agi aser tatidang ochishia aser shidak agitsü mechi state tesem ajunga nung anepdang 10:00 ako nungi nikongdang 1:30 ako

tashi mobile data aser internet service tem shibanga liasü.

Tatidang agiba tesem balala nung security forces tem kanga sashia yoka liasü.

Geographical location aser taoba mapang auyaba aser ochimashi mapa inyakba mechi examination centres 429 tashi 'sensitive' ta sangdong.

Ajisüaka iba tatidang atema mapang tashinung centres 2,305 nung tatidang sunepa agitetogo, ta osang ajanga ashi.

Chief Minister Himanta Biswa Sarma-ia social media sapang nung tang mezüngbuba agiba ADRE exam sunepa agitetogo ta ashi.

"Mepetmesü kecha melie iba mapa tulu takok ngua renemba atema Assam sorkar nung ketdangsür aser staff ajunga nem tenüngsang agütsür," ta Chief Minister-i social media sapang X nung ashi.

Sorkar mapa inyaksü atema nübu shimba nung sorkari ochishia inyaksü ta CM Sarma-i lanurtem dang nenshia ashi.

Deobar anepdang nungi candidates aika examination centres nung adenshia liasü. Exam centres indang kishi ya apendang 10:00 ako nung lapok.

Iba tatidang agütsütsü atema candidates 11,23,204 temsüa liasü.

Manipur nung minister ka kidang bomb apok; tensa tamajungba akum

Imphal, Rongjui/Sept. 15 (Agencies): Manipur nung Ukhrol kübok Hamleikhong area nung Minister for Veterinary & Animal Husbandry and Transport, Khashim Vashum'er kidang Honibar aonung bomb tesashi ka apok.

Tia kaa iba lendong atalokba mapang Naga People's Front (NPF) züngsem minister ya kidang meliasü.

Iba tesem nung aliba police tem arsanga bomb apokba tesemi ao aser tang iba tatalokba bushisüngdanga mapang lir. Iba lendong nung nisung asü-amaba osangbo mali.

Manipur nung ita aika mepetmesü adoker nüburtem timtem balala ajurua tensa mejungi aliba mapang ka nung iba lendong ya ataloka nüburtem tali jashiteper aser tetsübo lidaktsür.

Ano Kakwa Naorem Leikai nung lendong atalokba asoshi telangzüba agüja tentetba Joint Action Committee (JAC) ajanga Honibar ayatirm nungi tenzüka ghonda 24 general strike alitsü sangdong.

Mashisa aliba tetsür, Sanjita Devi'er ki anasa police temi

tear gas khaloktsüba ajanga la tebok nung bona aliba tanur asüba anema longkak aittsü ya sangdong.

September 11 nü ita toku mashisa alila Sanjita Devi'er ki nungi feet 10 dang pilar tear gas canister ka apokba ajanga la high blood pressure tenzüka liasü.

La Regional Institute of Medical Sciences (RIMS) bushia arsanga bener oaka doctor temi lar tanung ya mekumzüketet. Sanjita ya tang tashi ICU nung lir.

Tebok nung bona aliba tanur asüba ajanga state tesem ajunga nung longkak ait tenzüka longkak aiter temi Indo-Myanmar Highway densema lenmang tulutem mokdanga liasü.

Iba mapang longkak aiter aser security forces tsüngta raratepba osang lir, aser longkak aiter temi police dak long agi aon, aser iba yongji tear gas tali khaloktsü. Iba mepetmesü ajanga sorkari security forces tali yoksema curfew oziung tesashiba benok.

Imphal yimti nung anogo ana süngjema aliba sülen iba longkak aitba ya tenzüka liasü.

AKTDGC nung tasenpurtem pelaa agizük



AKTDGC nung mendenpurtem aser lokti senden nung tongti o jembir Wt. Purtila, Associate Professor noksa nung angur.

Dimapur, Sept.15 (TYO) : Dimapur Government College nung azünger Aor kaketshir tasenpurtem pelaa agizükba den lokti senden sentong ka yashi Ao Kaketshir Telongjem Dimapur Government College purtemi ayongzüka agiogo.

Iba sentong nung DGC nung tesayur Wt.Purtilai tajungshi o jembidang, kaketshirtem dang pei mapa nung kanga nendaka inyaksü aser shitakba kaketshisatsü ajangzükettsüsa pei tesayurtem den teti shisalemsatepa alitsü ajungshi. Laisa kong lidir liaka pei tetsü oshi mesentoki jembitsü aser renlokdaaktsütsü ayongzük aser parnok asoshi sarasademtsü.

Iba kasa sentong nung DGC nung azüngi arur tasenpurtem

pelaa agizüka tajungshi o ashiba den külemi parnok asoshi sarasadem mapang balaka AKTDGC nung Advisor Wb.K.Temjen Jamiri agia liasü.

Iba sentong nung AKTDGC nung tir Sp. Arang Pongeni tepela aser tenüngsang o jembi aser Kr.Takasangla Pongen aser Akümtong Jamir nati ken tajung ka aten. Iba senden nungsa lokti osangtem agia liasü. Iba mezüng sentong sülen, ano, kentenmenü sentong tajung ka agia kaketshirtem metetpelatepa ajungshitepba sentong senden anogo tembang.

Taküm 2024 küm Dimapur Government College (Arts & Commerce) nung Aor kaketshirtem ajak agi 285 lir.



Tetsürtem jenjang ajungkettsü aser tashi itdaktsütsü nükjidadong nung Mokochung nung aliba Young Women Christian Association (YWCA) ajanga September 14, 2024 nü YWCA building, Mokochung compound nung "Strengthening community" omen nung ajemdaker One Day Baking Class ayongzüka liasü. Iba baking class nung tetsür 28 arua aden, kong Dr. Kilangnaro lenisüba kübok cakes aser cupcakes balala yanglutsü sayua liasü aser tarutsü anogotem anogotem nunga iba mesükba sentong ayongzüktsü sentong lir, ta YWCA tir Rongsenmenla-i ashi.

Arvind Kejriwal-i anogo ana tsüingda Delhi CM mapa toktsütsü



Delhi Chief Minister Arvind Kejriwal-i New Delhi nung party workers' tem senden nung o jembiba mapang tangokba noksa nung angur.

New Delhi, Rongjui/ September 15 (Agencies): AAP tekolakba Arvind Kejriwal-i Deobarnü sangdong ka ajanga pai taruba anogo ana tsüingda Delhi chief minister mapa toktsütsü ta metetdaksüogo.

Arvind Kejriwal-i ashiba agi, Delhi assembly elections nung nüburtemi pa ochishir ta certify sütsü nung dang chief minister mapa agizüksü. "Onok kecha nunga aibelena mali ta kuli agütsütsü atema nüburttem court-i aotsü," ta pai shisem.

Paisa, election ya 2025 küm February ita masü saka 2024 küm November ita agütsü takhangba agüja liasü.

"Supreme Court-i tenokdangba agütsür aliba ajanga onok mapa inyak majungtsü ta nisung kari ashir. Parnoki onok nema tenokdangba agütsüogo. Nenok

ni ochishia lir ta bilemra kü nem vote aika agüjang. Ni vote ngua shimba sülenang CM menden nung amentsü. Election ya February ita agütsü lir. Ni Maharashtra elections den külemi November ita agütsü akhanger. Election magi tashi party nungi lenir kati chief minister mapa bena atatsü. Taruba anogo ana asem tsüingda MLA tem sendem amentsü, kong taruba CM shimtsü," ta pai ashiba ANI sangdong ka ajanga metetdaksü.

AAP kübok inyakertem den jembiba mapang Arvind Kejriwal-i, BJP puri par party raksatsüner aser linük yimtiba nung parnoki sorkar kümtetner, ta ashi. Paisa, parnoki pa tenüng menüksünüa liasü saka tamakok nguogo, ta ashi.

Arvind Kejriwal-isa, pai kechiba Delhi chief minister

mapa metoktsü iba indang jembiba liasü.

"Ni mapa metoktsü kechiyong ni linük indang democracy kümzüka yunüa liasü. Parnoki tasa tasen ka yangluogo.. parnok kongsa tamakok ngudir parnoki CM tem tepuokdaki yoker aser parnok sorkar kümteter," ta pai ashi.

Arvind Kejriwal-i, opposition chief minister ajak dang, teyazü taitsuba benoka parnok tepuokdaki yokra mapa metoktsütsü ayongzüka liasü.

Kejriwal ya Delhi excise policy ken o nung ED-i March 11 nü apu. Pa taoba hopta bail nung chiokogo.

Bail agütsüba mapang Supreme Court-i pa, chief minister indang office-i maitsü aser official file kecha nunga sign masütsü tenokdangba agütsüogo.

PM Modi-i Jharkhand nung sen crore 660 alang project tem amenoktsü

New Delhi, Rongjui/ September 15 (Agencies): Ato Kilonser Narendra Modi-i, Deobarnü Jharkhand kübok Ranchi nung sen crore 660 alang project balala amenoktsüogo.

Ato Kilonser-isa, Tatanagar nungi Vande Bharat trains trok tashi virtually tenzüka liasü.

Train tem ya Tatanagar -

Patna, Bhagalpur - Dumka - Howrah, Brahmapur - Tatanagar, Gaya - Howrah, Deoghar -Varanasi, aser Rourkela - Howrah lenmang nung senzütsü.

Ranchi nungi pai Deoghar district nung Madhupur bypass line aser Hazaribag town coaching depot atema

nüngshilong azüngia liasü. Modi-isa, Kurkura-Kanaroan line ya linük nem bendang agütsü, koba Bondamunda-Ranchi single-line section aser Rourkela-Gomoh route via Ranchi, Muri aser Chandrapura stations nung shilem ka lir.

(Maneni tapak 8 nung...)



Karnataka nung Deobarnü equality, unity, fraternity, aser participative governance temaitsü otsüsütsüsa 2,500-km talang human chain ka yanglua 'International Day of Democracy' mungogo. Iba human chain ya alima nung talangtiba asütsü ta Karnataka sorkari ashi, koba Bidar nungi Chamarajanagar tashi district 31 prongla ayimjema yanglua liasü.

BJP-i election kokra Anil Vij-i pa Haryana CM kümner

New Delhi, Rongjui/ September 15 (Agencies): Taoba cabinet minister aser Bharatiya Janata Party (BJP) MLA Anil Vij-i Deobarnü, par party-i taruba assembly elections kokra pa chief minister kümdakjang ta takhangba ka agütsüogo.

BJP-i sorkar kümtetra Nayab Singh Saini chief minister kümdaksütsü ta party-i jangja jangja metetdaksür aliba mapang ka nung MLA term trokbenbuba abensang yagi iba takhangba agüja liasü.

Osangbenertem den sensaksema mapang Vij-i ashiba agi, pa Haryana nung BJP MLA tem rongnung ajak dang tejentiba lir, aser pai party dang nungi tang tashi nung kecha meshia mali.

"Ni Haryana nung BJP MLA tem rongnung ajak dang tejentiba lir. Ni election nung trokben toktepogo. Nüburttem takhangba dak ajemdaker tangbo ajak dang ni lenir tejentiba asünung CM mapa meshitsü," ta Anil Vij-i ashi.

"Ajisüaka parnoki ni CM kümdaksütsü mekümdaksütsü aji temaba jenjang nung aliba lenirtem dak keta lir. Parnoki ni CM kümdaksüra ni Haryana indang noksa melenshitsütsü," ta pai ashi.

BJP lenir ya Ambala Cantt menden nung tokteptsü atema iba hopta otsüsütsüsa tekubenbuba nominations file süogo.

May ita Vij-i, pa tezülen toktsür aser party yongtsü nung pa ya ainer ka ama amshir ta shia liasü.

Taoba mapang Haryana chief minister Manohar Lal Khattar indang cabinet nung Vij-i home, health, AYUSH aser medical education aser research portfolios benogo.

Assembly menden 90 atema Haryana nung election October 5 nü agütsü. Vote tem October 8 nü azüngtsü.

June ita home minister Amit Shah-i, CM Nayab Singh Saini lenisüba nung BJP taruba Haryana election nung tokteptsü temsüa lir, ta ashi.



Meerut nung ki ka chirepba sülen anogo anabuba teküzmükba maparen benoka inyakogo. Uttar Pradesh kübok Meerut nung Honibarnü asemen tashi atongtepa tua sür aliba ki ka chirepba sülen tang tashi nung nisung 10 asüba jangjaogo aser teküzmükertemi ki telung ano nisung ka sabanga aliba küzmüktsü maneni merangdar.

Congress-i J&K election manifesto anogo 2 tsüingda sangdongtsü: Solanki

Jammu, Rongjui/September 15 (Agencies): Jammu and Kashmir assembly elections atema Congress party manifesto anogo ana tsüingda sangdongtsü, ta lenir tejen Bharat Singh Solanki-i Deobarnü ashi. Paisa, BJP-i tenangzüka balala agütsüba ya tapung ta ashi.

Congress-National Conference alliance-i Jammu and Kashmir nung takok angütsü ta temulung lema bilemba lemsatepba mapang pai BJP aija ashiba agi, parnoki kiralongrartem mesamsütet, Kashmiri pandit tem meyipa arütsü aser rehabilitation atema jenjang magitet aser local lanurtem atema mapa magütsütet.

Congress' Jammu and Kashmir affairs in charge-i ashiba agi, iba tesem yimjung nung toktsütsü aser terenlok asoshi sorkar kümtetba sülen

coalition partner temi common minimum programme (CMP) ka yanglutsü.

"Congress manifesto renema lir aser election mezüngbuba shilem magi tsüingda taruba anogo ana tashi nungbo sangdongtsü. Onok indang manifesto ya 'jumlas' nung amendaker malitsü aser onoki nangzükbatem benoka inyaksü asoshi jenjang tapet agütsü," ta Solanki-i osangbenertem dang ashi.

Jammu and Kashmir nung election ya shilem asem küma lemsar agütsü. Mezüngbuba shilem September 18, tanabuba September 25 aser tasembuba October 1 nü agütsü. Vote tem ajak October 8 nü azüngtsü.

Pai ashiba agi, iba assembly election ya kanga tongtibang lir, kechiyong Jammu and Kashmir ya linük aser alima ajungai repringdar.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR TENTONÜ, SEPTEMBER (RONGJUI) 16, 2024

Mapa angazükba mapang

Asenok ajak ya alima nung mapa inyaksü alir, anungji asenoki jangraba mapa koba agi tangar nungdak nung yaritetsü, item mapatemji reprangteta inyaksübaji asenok nisung shiai bilemdangtsübaji kanga tongtibang lir. Iba sülenji dang, ano, asenoki inyaksü reprangtetba mapaji angazüktsübaji kanga tenungdaksü asütsü. Tanübo asenok aikati mapa inyakner saka kechi mapa inyak nung asen asoshia aser tangar asoshia tajangzük asütsü ta asübaji mebilemdanger, anungji tapi agi mapa bushir aser ano aikati mapai asen bushia arutsü amai kidang smart mobile phone amshia atar. Iba jagi asenok dak sempet maliba agi masü mesüra asenok azümasenba agia masü saka asen dak mapa bushitsü shisatsü (idea) maliba agi asenok aika teinyaksüa maka aser tachitajemtsüa maka ta timtem tia nung lir. Kena, tanü asüng asenok lanurtem dak tajung ka reprangtetbaji, talisa Dimapur ama town-tem nung mapa tulu tila ta mali, tangu dang ngura inyaksü mulunga dang lir. Ibayongji, dokan aser restaurant aika nung asenok lanurtem aika sales girl, sales boy, waiter, waitress mesüra factory ama mapa inyakdak mapa tapu balala nung ita sen mechimenu asüyonga agia inyakba angur. Atangji, item kiburtemji teimbaka tzümartem lir, anungji khien bilemstübo tzümar kilir mesüra tzümar tenzükertem lir. Ajisüaka, kibur akümtsü asoshi tamasa kilir akümtsübaji Laishiba tesayuba lir. Aji odangbo masü. Nisung ka tanidaker mesüdang ser tanishir tajung ka mekümtettsü. Iba tangatetba nung tanü tazünger aser mazünger lanur shiai pi kidang pi tenzuka alitsübaji mapa angazükba mapang amato bilema inyaksübaji kanga tongtibang asütsü. Asenok Naga nung aser talisa Aortem ya akhi tsürabur mapang nungi kechisarina yangluteta aser züsenteta yoka aruba business inyaker telok aser kin ka masü. Yashi tashi asenok asoshibo asen lu nung züsentetba aonsutsü ayoktsübajia sobaliba anema inyakba taaktsü mapa ka amato liasü, anungji tanü ajungbena asenok shishilembaba mapa nung pungoka inyaksübaji tasak akümer, kechiyong asenoki meinyakdang aser memetet. Anungji business inyaksüba ya tazüngba degree kisung agibo meinyaktettsü, anungji asenoki tangar business inyaker kin aser nisungtem dang nungi angazüktsü bilema parnok tenzüktsübaji kanga tongtibang akümer. Aji oda, tanü asenok lanur kar süoshi mesüra gari ayokba mesüra hardware aser softwares ayokba dokan nung sales girl aser boy inyaka alirtem jagi küm ishika sülenbo kasa dokanji lapoktsü bilema inyakra, kasaji shitak ataloktsü. Iba amaji chiyongtsü yangludak aser anganüdak bakery aser restaurant amala nung inyakertemi chiyongtsü yangluba aser anganüba mapa aser yimyatemi angazüka kasa mapaji peisasa küm ishika sülenbo inyaktettsü. Aji oda, nisung shiai kechi mapa inyaksü jangrar, iba mapa inyakba tesem nungji tangar kibur kübok nendaknendaka ochishia inyaksübaji jangratsüla, kechiyong jangrayonga mapa mashi aser mangazüki mapa ka takok ngua meinyaktettsü. Nisung shia dak tangatetba ka alitsü nungdakbaji, tangar kidang kilir mapa inyaka tenzükbaji taküm piyong kilir asütsü asoshi masü saka kibur asütsü asoshi angazükba mapang ka lir ta metettsüla. Atangji, ajaki kibur kümner aser kibur akümtsüla saka kibur asütsübaji mapa temela masü, kechiyong sentong ajungtsüla, ajak den putepa alitsüla, taremsük asütsüla, meranga inyaksüla, nungsen aser tetsübu tizüktetba nisung ka asütsüla. Item tangatetbatemi temulung nung yur asenoki asüng kibur akümtsü asoshi tanü tangar meyong mapa inyakdak aser shishilembadak temulung lemtetba kilir tajung küma tenzükttetra, tanü aseni tenzükba kibur indang business-ji asüng asen meyong akümtsü. Atangji, kibur akümtsü asoshi mariteptsüla aser tashiyim agi kibur akümtsü memerangtsüla saka kibur akümtsü asoshi mapang peria kiburtem tenzükür külenang asenoka asen mapa nung kibur kümteta inyaksüsa, tamasa, mapa angazüktsüla aser tangari asen dak temulung lemtettsüsa asenok alitsüla.

OLEMSABANG

ASÜNG ASOSHI TANÜ LANURTEM DANGI YIMYIM

~ Mrs.R. Mapukala Pongen, Merangmen, Tzürangkong.

Lanurtem ! Aka-asor asen lima kichi akümer,reprangangjo!
Ya shir kuret, nenoki shisadangdar ma ?
Yongyima teli, ola atokang, apusoang, ya odang toktsütsüla masü.
Kichiyong tera menura lanurtem asüng jenjang makatsü.
Alima-ibo lanur dak yimlar, saka tanü naia kichi pilemer!
Yimdena, Arogo-a, lokti-a jungjunga raksatetogo.
Jiloshi sayur Telok mesüka, alima menüdong kümogo.
Lokti ajak rongsen akar yangkoi ia dokogo.
Joko Naga lima tamang tia kati tongogo.

Naga nung azübo temerük, kelak-küpong yazü mali.
Asen tzürapur yamaji lia aruako ! Tanü lanurtem kichi pilemer.
Akibo kiba-lemburen pentet-penteta azü temerük den-ang lembu.
Tanü lanu putubo, talisa tetzürtem, Hindu,Muslim denang linür.
Tarutsü mangdang makartem ! Nai asoba tanurtem kong alitsü.
Nür tanurtemji anir na INDIA lima nungji alitsü asü?
Aeirtem ! Naga kin den lembu-ang, asen sobaliba temetongako!
Asüng ser yanü na asoshi temeden kichia makatsü.
Angatetang, tarutsü nung na junga linüra, jungjunga shisadangang.

Lanurtem ! Mapang ka British sorkar tashi agi amokpang,
Par ozüng kübok sobaliba aser tamangba ren nokdang.
Saka asen tzürapurtemi ma-a ta nokdak.
Kichiaser tarutsü mangdang pari jungjunga angateta liasü.
Kichi kazüka yok, lungzük jakdang, Ar alangdang.
Aben jagi Naga nung yabo palaka ta lazüker asen lima toktsü.
Tanü bendangertem, akodong amongi aru ama, Naga nung amokpanger.
Parnok tekolak kümdaktsür,tetsünga shidokja tenzükür, aseniang.
Par tasa tamajung agi Naga nung lokti ajak anokshitsür.

Repranga liang,par azü, tekolok, shisatsü asen den palala.
Tanem-tanemi Naga nung rongsen ajak par ket-i aotsü.
Tanübo raktepa konang ka ama tebu yimdaktsür.
Naga nung tenüng tanüng ajak Tzümar chanu nem jatsür.
Süra tarutsü asen chir, semchisemnorbo kichi jatsütsü.
Ali kimong dena parnok nem senmang amangdaktsür.
Loktiliba ajak nung tongti shilem par nem atadaktsür.
Asen Naga nung-a sembet tajung aketer mali na.
Ata-a liang, asüng asen lanurtem parnok lar akümtsü.

OH ! Lanurtem, asüng asoshi nenok jenjang wazüka yuang.
Rongsen aser o tanang agi lanur temeden teyok.
Tangateter Tzürapurtem temulung rongsar lanur putu asoshi.
Tanü lanur shirnoki ochi nung nokdaktsü, ochi sen yong teyok.
Na shidak Naga nung süra, Nok o Nü rara masü,
Saka ochi aser teindang, tasütait yimyim ayimang.
Mapa meranga inyakang, Tangar dak nendaka teli.
Sensakerbo ochi, aser temeden sen yong ayoker ako.
Saka ochishirbo kecha nunga tetsübu mali.

Tsüngremi alima yanglu dang tetsür aser tebur ajak kasa yanglu.
Saka tanü tetsürtem rishikangshi mapatemji bilemdangang.
Meimchir molungjang agi tim masüba tashiyim amshir.
Ali pokli nungi matalokdangba tesembatsü mapa ya koda!
Naga nung dakbo ibala shisatsübo mali südi ja!
Tanü asüngbo kanga bulua atalokba mapa tamajung ka.
Tera ajak asadanga bushia odangra.
Au! Asen nisunga makmanü, shiruru mesük karbo alitsü südi.
Saka teimba temeyoktep kiba lembu nungi asoba chirtem ajanga ataloker.


Angang... Tanübo shidakba tsüngchi o ka jembidi.

1. Nagatsürtem...Tsümar den kibalembo tesü.
2. Tangar kin tebu teyimdaktsü.
3. Nür naroküm tenüng tajung tejadaktsü.
4. Naga nung masüba tanur temesü.
5. Naga nung li parnok dang teyok.
6. Tebu ajaba tenüng nung ali-kimong senmang tagütsü.
7. Takar,Tulur süaka lokti nung tongti shilem tagütsü.
8. Tzüma-longmar aser par chirnur nem senso temeden kuli kakat tagütsü.
9. Naga nung sobaliba sübotsü parnok nem tesübodaktsü.
10. Parnok dang meimtsü, saka sobaliba mayoktsü.
11. Ao senden, NSF, AKM temzüng ozüng asen nübori meraketa wazüka yudi.

Ya asüng asoshi tanü lanurtem dangi yimyim ayimoktsür ani.....

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Evangelist George Sweeting arishi kum 99 nung süogo



Dr. George Sweeting
1924 - 2024

Chicago, Rongjui/Sept. 15 (Agencies): Moody Bible Institute ajanga sangdong ka nung, par institution tir aser mapang tatsüka lir chancellor ama kum 30 jungnua inyaksang George Sweeting arishi kum 99 nung Mongulbarnü süogo, ta ashi. Pa ya temulung nung evangelist aser tanüla bener arur ka liasü, ta institute ajanga ashi.

“George Sweeting indang takum aser ministry ajanga iba lima Moody nung aidoktsü makokba temaitsü yutsüogo,” ta Moody Bible Institute tir Mark Jobe-i sangdong ka nung ashi.

“Pa akumli mapang par kibong, Arogo, aser osangtajung tashi melenshitsüba kanga meima liasü,” ta Jobe-i ashi.

“Par kinunger aser pai kongshiba takum tem den külemi mang ayimer, Tenyar Paul-i 1 Tesalonika 4 nung shia aliba ama pa Tsüngrem den lir aser asenoki künü pa den ajuruteptsü ta amanger.”

Sweeting ya Chicago nung aliba Moody Bible Institute nung 1971 kum tir ama inyäk tenzük aser 1999 kum tatem

nung chancellor ama inyaka tembang. 1945 kum azünger Moody alumnus ka ama Sweeting lenisüba nung iba institution kanga melenshi, ta ashir.

Sweeting-i pa kinungtsü Hilda, jabaso George, James, Donald aser Robert aser semchir aser tanabuba semchir aika yutsür asü.

Sweeting nem akhum agüja Moody ajanga ghonda ka “Dr. George Sweeting: A Tribute” sentong Honibar nikongdang 3:00 ako nung agitsü. Iba sentong ya Moody Radio network nung prokshitsü.

Sweeting ya Khristan kibong ka nungi intet. Pa lanuwa nungi lenir asütsü sempet liasü aser New Jersey nung aliba Hawthorne Gospel Church nung lanur asüandang kanga junga melenshi. Iba arogo indang youth ministry ajanga pa evangelism tejangraba tali akangshitsü.

Sweeting ya 1940 nung Khristanpur tenzüksü takum bendanga agüja liasü. Pa ministry ya Hawthorne Gospel nung tenzük aser yangji pa ordain süa associate pastor

tashi inyäk.

Pa Moody nung azüngdang testicular cancer puteta temang nung timtem jenti ajurua liasü.

School züngzükba sülen Sweeting-i evangelistic mapa America aser linük tesem balala nung kum toku tashi inyaka revival aser Evangelical campaigns tem ayongzuka agia liasü. Par külem tenzük tem den külemi Sweeting-i anogoshi ama sayutsüngia linük tesem balala sema jaja liasü.

Pa pastoral ministry dangi meyipba ajanga arogo tasür alirtem, talisa New Jersey nung aliba Madison Avenue Baptist Church aser Chicago nung aliba The Moody Church asendenshidaktsü.

The Moody Church nung pai mapa tulu inyaktetba ajanga Moody Bible Institute nung mapa tuluba nungloksü.

Sweeting ya tir inyakdang Moody Bible Institute nung temelenshi tulu aru, sentong tasen balala tenzük aser alima tesem ajanga nung educational aser Evangelical outreach ulushia Moody Pastor’s Conference aser Moody Radio amala tenzük.

Sweeting arishi tatemlen local church ministry dangi meyipa seior adult ministry nung rangloker 2018 kum pa anisüngzük mangu tashi inyaka liasü.

Pa arishi tatemlen pa indang kaket tatemsa Full Circle: A Pictorial Autobiography of George and Hilda Sweeting ya zülu.

ANOGO ABEN TSÜNGREM DEN

Mapa aser Tenzükba

- Kolosi 3: 18-21

Khrista tsübuba nung nenok peisasa kati ka kübok liang. Efesa 5:21

Kati ka den akhümtsübu mesayubaji züpazüpa magitsüla. Yisuji asenok lenitsü tatishitsü lir. Pai ajak dang akhümtsübu tulu sayu, talisa shirnok tangari mezüngoki ali parnok dang Pai akhüm tsübu. Khristai, tangar asoshi bilemetsüba indang Pauli tanü lesson nung kati ka kübok alitsü ashi. Iba nung asen tejangraba dang nungi tangar tejangraba tama sädaktsüba, asen tebilemba dang nungi tangar tebilemba tama sädaktsüba dena lir. Khristan yimsü nung tangar madak kibur akümtsüba menden mali.

Asenok ajak alangzüksü asoshi Yisui Pa taküm agütsü. Ajak nem jenjang agi malizüktetba sempet agütsü. Iba akhüm tsübu tulu Khristan mozü ki aser nüngdakba pur yariba lokti tentet nung dena lir. Iba akhüm tsübu nung telemsa arla lokdoker aser ozüng raksaba, tejak ajiba, ochi meshi-i asenok rongnung inyakba indoktsü bushir.

Ibai kidang tenzük. Khristan jakla liro angazükdakji kibongji lir. Ibai training agidak ka lir. Idaki o agi dang masü taküm libaliro ajanga Khristan yimya angazükdaktsür. Kidang tangar nüngdak aser taginüba nung yaritsü renema lidaktsür. Koba kibong nung pei atema dang bilemetsü angazükdaktsür iba kibong den kiyonger sünür malir, Khristan kulisüba nung tamakok aludaktsür. Kibur Tsüngrem, onok nung kati ka dang akhümtsübutepa alitsü, aser Ne mapa jungkai adokdaktsütsü yariang; Kibur, Kümtetdakba Yisu tenüng nung; Amen.

Tashiyim agi yimsü melendaktsür ana kumzüksü court-i tuyu

Lahore, Rongjui/Sept. 15 (Agencies): Pakistan nung aliba high court kati Khristanpur adianu tetsür ana - ka arishi kum 13 aser ka 18 - tashiyim agi Islam dangi meyipdaktsür kibong kumdaktsü, tena pua bener aor dang nungi kumzüksü police nem totuyuba agütsü, ta par kibong indang okatsüri ashi.

Neha Javed aser teyi Sanaha Javed na July 23 nü Pattoki Tehsil, Kasur District nungi pua bener aoba police temi kumzüksü memulungba sülen Bodhbarnü Lahore High Court Justice Muhammad Tariq Nadeem-i Kasur District, Punjab Province indang police tekolakba dang tena kumzük report agütsütsü totuyuba agütsü, ta attorney Sumera Shafique-i ashi.

Court-i tetsür ana ya Muslim nung Muhammad Zain aser Muhammad Ali nung ket nungi kumzüksü ashi. Tena ya adianu lir.

“July 23 aonung par kibong ya takdang ana aliba quarters nung mejanga alidang Zain aser Ali na den mejangjaba

nisung kar ki telungi aiter tsürabor indang takdang ya temalen nungi shibang aser tetsür ana ya pua bener ao, ta Shafique-i Christian Daily International-Morning Star News dang ashi.

Makamait Catholic kibong yagi police nem First Information Report (FIR) ka agütsü aser parnok bushi tenzük ta lai ashi.

“Police temi parnok den amalitep maka aser teimla maka parnok sasa par jala tem bushitsüsa akum,” ta lai ashi.

Tetsür ana ya Islam dangi meyipba kulizüng kakat aser Nikahnamas (Islam nung kiyimba kulizüng) noksa tem kinunger indang mobile phone nung July 29 nü angu, ta attorney-i ashi. Iba kiyimba kulizüng nung arishi kum 13 tain Neha ya arishi kum 19 aser arishi kum 18 tain Sanaha ya arishi kum 21 ta sangdonga liasü.

“Iba mapa inyaktertem ya kasa tesem nung alir aser tetsür ana ya makamait kibong nungi aser Khristan yimsü amangba yong tenük yok,” ta

Shafique-i ashi.

“Police yimya tesasatsüka lir, kechiaser parnok tetsür ana bushitetsü mera kecha magi. Tang court-i Kasur District Police Officer dang tetsür ana ya kumzüksü tuyu, anungji tang police temi tai tonglokja alir anema mapa karbo inyaksü imlar.”

Iba ama ken o nung teti atalokba ama temulung melema aliba kinunger temi ken o agiena jala ana amadoktsü ashi aser tebu tekok meranga nokdak dang teka sangshi, ta jala ana tetsü Sumera Bibi-i ashi.

“Tai tonglokja aliba kinunger temi onok dang ken o benoka aliba agentsü akhanger aser kü kinungbo dak pu agi mechi,” ta Bibi-i Christian Daily International-Morning Star News dang ashi.

“Komasür onoki ozü jala takum samadaktsütsü? Neha ya arishi kum 13 dang lir aser la pua bener oa la den kibong akumsang ya la indang arishi kum anaben agi tainba lir.”

La kinungbo ya shiranga alir aser tena jala dak mapa

tamajung inyakba ajanga pa temang tamajungba akumer, ta pai ashi.

“Onoki police dang ozü jala kumzüksü mepishi, saka parnok kecha meinyak. Ozü jala indang osang dangar ket nungi angashidang kinungbo aser jabaso tambosang tena item tesemtem bushia ao. Tena senzüsempongtsü atema sen aputsüsa akum, aser tang onok sentsüh agi sünger lir,” ta lai ashi.

Court ajanga ochi obendang agütsütsü Bibi teimla lir.

“Ozü jala ana ya ozü kidang nungi pua bener aoba sülen mongudang. Onok kanga shisabolur aser kechi südir süaka kidangi shilangdaktsüner.”

Tena ya ano tanur trok lir. Anojungi kibong akumba nungi nokdangtsü mechi Punjab provincial government yagi April 25 nü Punjab Provincial Assembly nung Punjab Child Marriage Restraint Act, 2024 benok, kong kibong akumtsü asoshi tetsür aser tebur arishi kum 18 asütsüla ta shia lir. Taoba

mapang Punjab nung kibong akumtsü atema arishi kum 16 asütsü mela liasü.

Iba bill kübok arishi kum 18 majungdang kibong akumer mesüra kibong akumtsü inyakteper, parnokji kum asem tashi tepuokdak ayutsü aser senchi sen 100,000 Pakistani rupees (\$360 USD) aser 200,000 rupees (\$720 USD) tsüngta achitsü shia lir.

Marriage registration mapang kibong akumba tenangzüktep agir, union council indang secretary aser tebur indang Computerized National Identity Card (CNIC), passport, educational certificate mesüra arishi kum 18 jungogo ta kuli agütsüba danga documents tem repringtsüla. Marriage certificate atema application agütsüba nunga iba amala documents ya dena alitsüla.

Open Doors ajanga alima nung Khristanpur alitsü asoshi linük tamajungtiba 50 asadanga 2024 World Watch List nung Pakistan ya jenjang tenet buba nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Tanela

(n) temang süaka kodanga masütsüba taküm (soul, spirit)

* Asen temang dang nungi tanela jenjang tuluba lir.

Tanemi

(adv) meilongi, anepanepa (slowly, gently)

* Nurse ka tanem tanemi arur shiranger dak tanemi ajem agütsür ao.

OLONG PAITEP # 6925

1		2		3		4		5
			6		7			
8								
					9			
		10						
11								12
				13		14		
15								
16						17		

TIPLÉN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasadem dang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6924 TELANGZÜBA

TIPLÉN :

- 1. Tesangra, 5. Mungo,
- 7. Kisen, 8. Salem,
- 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa,
- 3. Aon, 4. Aso, 6. Nile,
- 9. Alizüing, 10. Omen,
- 11. Lemta, 13. Ola, 14. Kin.

NAI-A YA METETTER MA



Alima nung tanurtem rongnung teka aser tetsüing tulutiba aketsangji arishi küm 16 tain Eric Kilburn Jr lir. Pa ya Michigan, US nung alir aser iba atema 'Guinness World Records 2025' book nung pa zülusemogo. Iba kaket nung "Largest feet on a living teenager (male) 34.30 cm (13.50 in) by Eric Kilburn Jr" ta zülua lir. Eric indang American shoe size ji 23 (UK size 22) lir aser pa teka 23.20 cm (9.13 inches) lir.

Mizoram CM security atema Thar gari 3 ali: Police



Aizawl, September 15, 2024 (Agencies): Mizoram Chief Minister nija benshitsü atema Mahindra Thar gari asem ali ta opposition Congress-i aitsüba Mizoram Police-i osang jangjatsüogo.

Congress-i ashiba agi gari asemji Rs 51 lakh agi ali aser sorkari public sen tim mesüi amshir ta tai tonglokja liasü.

Mizoram Police-i aliba Thar SUVs asemji pa nija atema masü saka CM security atema aliba lir ta Mizoram Police-i ashi.

India sorkar indang "table of precedence" nung chief minister tem ya jenjang 7 buba nung lir aser parnok nem Z+ security cover agütsür ta police-i ashi.

Chief minister'er convoy ya pilot cars anati anir, iba sülen escort motors aser Tail cars anidaker ta Mizoram Police-i metetdaksü.

CM'er convoy nung amshiba garitem ya pa meyong masü saka police department-i police department dak sendakba atema amshir.

CM convoy nung pilot aser tail cars atema Maruti Suzuki company indang Gypsy aser escort motors atema Mahindra Bolero amshir. Ajisüaka, tang CM'er convoy nung amshiba garitem kanga tejen akümba dang masü saka tawa tu asemen tashi len tom nung raksa ta police-i jangjashitsü.

Item dakji alia Gypsy models joko meyanglur anungji police department-i CM security escort atema Mahindra Thar SUVs asem ali ta Mizoram Police-isa metetdaksü.

Assam sorkari recruitment exam tiptema agitsü: CM Sarma

Guwahati, September 15, 2024 (Agencies): Chief Minister Himanta Biswa Sarma-i social media nung tang mezüing atema ADRE exam takok ngua agiba osang metetdaksü.

"Iba mapa tiptema inyaktetba atema Assam sorkar ketdangsur aser staff ajak dang pelaba metetdaksür" ta CM Sarma-i ashi.

Assam nung lanuputu dang government recruitment nung sorkari ochishia inyaksü nangzüker

ta CM Sarma-isa ashi. Deobarnü Assam Direct Recruitment Examination (ADRE) takok ngua agiogo aser tatidang agiba nung timtem kecha maliasü.

Assam sorkar kübok department balala nung Group-III employees mapa tazüing nung nübo anioktsü atema tanü tatidang agia liasü.

Tanep 10.30 ako nungi nikongdang 1.30 ako tashi tatidang agi aser sorkari Assam ajungalen tanep 10.00 ako nungi nikongdang

1.30 ako tashi mobile data aser internet services shibang.

Maneni sorkarisa examination centres kima nung sepaitem mapa lemzüksü.

Tanü examination centres 429 tashi 'sensitive' ta züingoka liasü kechiyong tesüiba nung item nung auyazüka züluba aser tim masüba inyakyim benshiba tatalokbatem liasü.

Tanü centres 2,305 nung tatidang agi aser ajunga nung tim masüba kecha melii dang tatidang agiogo.

Guwahati nung Manipur Kuki telungpur tetsüti ka apu

Guwahati, September 15, 2024 (Agencies): Assam Police nung Special Task Force (STF)-i Manipur nung telungpur telok ka nung finance secretary puogo.

Guwahati kübok Beltola nung police-i United Kuki National Army (UKNA) finance secretary apu.

Osang tejangja ka angazükba sülen STF telok kati September 13, 2024 nikongdang Beltola tesem mita ao ta Assam Police CPRO, Pranabjyoti Goswami-i ashi.

Idangji STF teloki arishi küm 34 tain LS Yosef Chongloi apu. Pai Manipur aser Assam arrtsülen ozüing alema mapa aika inyak ta pai ashi.

Chongloi ya Manipur kübok Churachandpur district nungi lir. Kangpokpi district kübok Saparmeina anasa Improvised Explosive Device (IED) ka amshia RCC Bridge poksatsüba nung pai shilem agi ta temulung



LS Yosef Chongloi

melemi bilemer.

Taküm April ita iba lendong atalok aser National Highway-2 nung iba apu ajanga Imphal den Nagaland kübok Dimapur sendakteper ta CPRO Goswami-isa ashi.

Taküm küm tetenzüklen Manipur kübok Tamenglong

district nung Indian Oil Corporation Limited (IOCL) convoy amakba nunga pai shilem agi ama temulung malemer ta paisa shisem.

Chongloi ya STF police station case dak sendakba nung apu aser maneni bushisüingdang südar, ta Goswami-isa ashi.

Myanmar tzümetsüing nung asür nisung 74 jungogo



Yangon, Rongjui/Sept. 15 (Agencies): Typhoon Yagi aruba sülen Myanmar nung nisung asür 74 jungogo, ta mitkar yimsüsüri bendanger teyari meshir anogo ka lir state media ajanga Deobarnü ashi.

Typhoon Yagi aruba sülen tzümetsüing aser alinen ajanga Myanmar, Vietnam, Laos aser Thailand nung nisung 350 jungnua süogo, koba ajanga taoba hopta tatemlen kongshi, ta ketdangsür temi ashir. Myanmar nung Hokulbar nikongdang tashinung tzümetsüing agi nisung 74 asü aser 89 samar bushir, ta Global New Light of Myanmar ajanga ashi.

Search and rescue operations telidak lir aser

tzümetsüing ajanga ki 65,000 dak tema, tzü nokdang pongu raksatsü, ta ashi. Mitkar yimsüsüri tem yagi taoba mapang nisung 33 süogo ta shia liasü aser nisung 235,000 dak tema pei ki yutsür tesem balala nung jenoka lir ta shia liasü.

Linük yimtiba Naypyidaw densema central region tem nung tzü agi alu aika mubangogo. Tenemlen alinen aluba osang lir, saka lenmang, apu, phone aser internet line tem raksaba ajanga osang magiteter.

Central aser southern Myanmar ajanga ayimba Sittaung aser Bago ayong tem Deobarnüa 'dangerous levels' alema yima liasü saka anogo ishika tsüingta ajemtsü imlar.

Tzümetsüing adokba mech

pei ki yutsür tesem balalai jena aortem anenzüksü atema Myanmar nung ketdangsür temi relief camps 82 lapokogo, ta state media ajanga ashi. Deobarnü Thailand indang weather office-ia Mekong ayong ajanga aoba province tem nung tzüinglu maneni sashia arutsü ta tekum dangtsü ashi.

Tzümetsüing yagu Myanmar nung timtem tali agütsür, kong nisung million 2.7 dak tema rara ajanga pei ki yutsür tesem balala nung prokshia lir. Myanmar mitkar leniri tang mezüingbiba tzümetsüing timtem nung yaritsü atema bendanger dang teyari meshia liasü, ta state media-ia Honibarnü ashi. Taoba mapangbo mitkar temi bendang lima nungi yokba teyari nokdang mesüra jashidakja liasü.

Taoba küm tashi tait Cyclone Mocha agi timtem agüja aliba nisung million ka shi nem teyari agütsütsü merangba indang senzusempongtsü temelaba agienja liasü. Myanmar nung aliba UN indang Office for the Coordination for Humanitarian Affairs (UNOCHA) aser International Committee of the Red Cross (ICRC) ajanga mitkari teyari meshiba nung telangzüba agüja mali.

Yemen nungi khaloktsüba missile Israel nung tsük

Tel Aviv, Rongjui/September 15 (Agencies): Yemen nungi khaloktsüba long-range ballistic missile kati central Israel dak kongshi, aser missile tsükba tesem nung mi adoka liasü, ta Israel military-i metetdaksü.

Iba missile khaloktsüba lazükba sülen Tel Aviv aser central Israel kübok tesem balala nung air raid sirens ola agütsü, kong Ben Gurion international airport nunga sirens ola agütsüba densema lir. Ola angashiba sülen inüburtem tejenokdak bushia jenshia oa liasü.

Missile ajanga nisung asüba mesüra teraksatsüba bener arutsüba osang kecha mali aser mapang tatsüka dang lir aki ama maparentem inyaksangshi tenzüka liasü.

Military-isa, Modiin jila nung train station ka indang escalator ka nung missile teraksa tilaka tsükba indang noksa lemsatapa liasü.

"Central Israel nung mapang tatsüka tejakdang sirens ola agütsüba sülen surface-to-surface missile ka anütoklen nungi central Israel dak khaloktsüba putet aser iba missile ya moapu nung tsüka liasü. Lendong nung nisung yiruba osang kecha mali," ta military-ia ashi.

Israel indang emergency services nungi Magen David Adom-i X nung post ka ajanga ashiba agi, nisung teku tashi tejenokdak bushia oya aliba mapang terara yirua liasü.

Iba tesem nung ola tulu adoka apokba ola angashiogo, koba military-ia ashiba agi Israel indang missile interceptors ola

liasü. Parnokisa, Israel nunger atema parnok indang protective guideline tem memelenshi dang lir, ta metetdaksü.

Kasa mapang nung Houthis indang Saba news agency sangdong ka ajanga ashiba agi, Israel indang defence system-i Yemen nungi yokba missile menokdangtet aser iba ajanga mi adokdaksüogo.

"Missile 20 tashi-i mekhadangtetba sülen Yemen indang missile ka Israel tongogo," ta Houthi media ketdangsür Nasruddin Amer-i X ajanga metetdaksü.

Iba telok military otongdar Yahya Saree-i ashiba agi, parnoki Jaffa tesem nung parnok tsükchir Israel indang military position ka raksatsütsü asoshi hypersonic ballistic missile tasen ka khaloktsü aser iba missile ya gi Israel indang air defence system tem ajanga otetogo.

Houthi telok, shirnok dang Ansar Allah (supporters of God) ta-a ajar, parnoki linük yimtiba Sanaa densema Yemen nung tesem timba amokbanger lir.

Iba telok yagi Palestine nungertem pusema aser Israel-i Gaza tanen makai amakba anema November ita nungi Temerem tzüyim, Gulf of Aden aser Bab al-Mandeb strait nung Israel den sendaktepa aliba rongtem maka arudar.

Houthi puri iba jenjang agiba ajanga rong company temi parnok indang rongtem Southern Africa meketa lenmang talangba amshidaktsüdar, aser iba ajanga sen timba intoker.

Kasa mapang nung United States-i aniba military coalition-ia, January ita nung Houthi pur tamendakdak balala maka arudar, ajisüaka Yemen nung amendaker aliba iba telok yagi rongtem maneni amaker.

Maneni iba telok yagi Israel kübok south len amenoka aliba Eilat yimti, koba rongnendak tongtibang ka lir, iba yimti ya missile aser drone tem amshi mapangshia maka arudar.

June ita iba telok otongdar Yahya Saree-i ashiba agi, parnoki Iraq nung amenoker aliba Islamic Resistance den longjemer anaben tashi Israel kübok Haifa rongnendak rongtem makogo.

July ita Houthis puri Yemen nungi Tel Aviv dak long-range drone ka khaloktsü aser iba mapang nisung ka tepset aser tangar pezü yiruja liasü.

Iba sülen Israel-i Yemen kübok Hodeidah rongnendak anasa Houthi pur military tamendakdak balala anüing ajanga maka liasü. Israel-i tesem balala amakba mapang nisung asem tepset aser nisung 87 tashi yiruja liasü.

Gaza nung rara tenzüka sülen Houthis puri Israel amokmerena arudar aser Gaza nung rara manen tashi parnoki Israel anema nokdaksü ta tenangzüka agütsür inyakyim balala benoka inyaksangshia arudar.

Kasa mapang nung Israel pur Lebanon nunga Hezbollah pur dena tanen makai raratepa arudar. Telok anapronglai arrtsü adena military tamendakdak balala melentepa maktepa arudar.

OFFICE OF THE NOKPU VILLAGE COUNCIL

B.P.O - LONGCHEM, P.O - MANGKOLEMBA
MOKOKCHUNG DISTRICT, NAGALAND

Ref:

Dated 15th Sept./24.

TENÜNGSANG AGÜTSÜR

Japukongsanger asoshi kanga tongtipang taküm lemag; "Longchem- Saringyim-Naganijan Road", onsara mejungi raksar senzusenponger ajanga kanga timtema okronga aliba mapang ka nung asen "Japukong Arogo Toklang Tenzüker Telongjem" (JATTT); neburtem timtemba reprangteta, 6th Sept./2024 anogo nung par nebu aser rongsen jenti indoka lemag yanglushitsüba atema JATTT nem tenüngsang tetushi agütsür. Tsüingrem tenzüker temi tangatetba tajung nung neburtem asoshi koba mapa tajung inyaksüogo, iba mapa ajanga tanü neburtem senzusenponger anisüingzüka iba lemag nung tajangzük ngudaki.

Nokpu yimden-i nenok tangatetba aser mapa tajung asoshi tenüngsang tetushi tulu agütsür, aser ano maneni asen teyanglur Tsüingremi JATTT ; asen neburtem asoshi moatsüa amshiang ta ozü sarasadem.

Sd/-
(I. Meren Walling)
Chairman
Nokpu Village Council

Sd/-
(Limasünep Lkr)
Secretary
Nokpu Village Council

CIA-i Venezuela tir tepsettsü tasa yanglu ta aitsüba US-i magizüker



Nicolas Maduro

Washington, Rongjui/Sept. 15 (Agencies): CIA ajanga Tir Maduro aser ketdangsürtem tepsettsü tasa yanglu ta Venezuela-i tai tongloktsüba United States-i magizük.

Linük raksatsütsü atema tasa yangluba nung temulung melemei US senso asem, Spain nunger ana aser Czech nunger ka puogo, ta Interior Minister-i ashi.

Pua alirtem ya "mercenaries" tem lir aser iba operation ya CIA-i anir inyaker aser nok-nü noklang aika puogo, ta Diosdado Cabello-i ashi.

US-i iba ya magizük aser khenyongi tiaüzü lir ta ashi, koba Washington-i Venezuela sorkar ketdangsür 16 nem sanctions agütsüba sülen ataloker.

US military züingsem ka pua lir aser ano mejangja osang kar ajanga Venezuela nung US senso ana pua lir ta ashi, ta State Department indang odongtari ashi.

Pua alirtem yagi Eastern Europe nungi "French mercenaries" den osangtsüsang agitep aser Venezuela amaksü merangba operation nung shilem agia liasü, ta Cabello-i langzü.

Rifles 400 dak tema apu aser pua alirtemi kiralongra mapa inyaksü tasa yanglua liasü, ta paisa ashi.

Venezuelan sorkari ashiba agi, pua aliba Spain nunger ya Madrid indang National Intelligence Centre (CNI) den

sendaktepa lir.

Ajisüaka Spain sorkari nisung ana ya itdangiterba tentet nung mali ta ashi.

"Venezuela nung yimten tashi raksatsütsü operation nung dena lir ta angatetsüsa jembiba Spain-i magizüker," ta osang ajanga ashi.

Czech Republic nungi telangzüba magütsü lir.

Honibarnü osangbener senden ka nung jembidang, "CIA-i anir iba operation agir, aser ajiaki maoksar saka National Intelligence Centre of Spain ya teti kangabo temai madoker, kechiaser yangi CIA lir ta parnoki meteta lir," ta ashi.

"Pua alir ana yagi Tir Nicolas Maduro, Tatong Tir Delcy Rodriguez, ni aser ozü party aser ozü revolution aniba lisopur telok tepsettsü nükjidong tejangja nung mercenary telok ka Venezuela-i anir arutsü repranger ta ashi."

July ita election nung mangatettep liaka Maduro-i akokba ajanga US aser Spain den Maduro sorkar ya mangatettep adoka aliba mapang iba tai ya tongloktsür.

Sorkar den tesendaktep tajung aliba Venezuela indang National Electoral Council (CNE) ajanga Maduro-i takok nguogo ta sangdong saka voting tallies tejangja mesangdong.

Opposition ajanga data sangdongba nung par candidate Edmundo González-i takok nguogo ta ashir.

NWA team Dimapur airport nung agizükogo



Dimapur, Rongjui/September 15 (TYO): Nagaland Wrestling Association (NWA) nungi züngsem teku shirnok "All India Traditional Wrestling & Pankration Federation" (AITWPF) tawabangba kübok 5buba World Nomad Games 2024 nung oa asayaba Indian Sports contingent nung densema liasü, parnok Deobarnü 1:30 ako nung Dimapur tonga aruogo.

Astana, Kazakhstan nung 5buba World Nomad Games

2024 nung hopta ka tepeyong mongzuka asayaba sülen parnok kecha tetsükdaksü makai state tonga aruogo.

NWA tir, Vivolie Kezo-i, Association tenüng nung team ya tanü Dimapur Airport nung pelashishia agizüka liasü.

Iba asayamung nung team nungi asayar kati danga medal mongutetaka team-i kanga junga shilem agiba atema NWA tir Vivolie Kezo-i parnok nem tenüngsang agüja liasü. Paisa asayartem dang temulung

matemtsü aser tarutsü nung tejangraba tulu nung takok angutsü atema rangloker inyaksü ajungshia liasü. Iba asayamung nung NWA nungi asayar karibo quarter tonga asayaogo.

Deobarnüsa NWA tir Vivolie Kezo-i Dimapur nung par kidang team asoshi chiyongtsü renemja chiyongdaksüba sülen team ya Kohima-i tua liasü, ta Joint Secretary, NWA Kuzhovesa Soho-i sangdong ka ajanga metetdaksü.

'Test anaprongla akoktsü atema onok asayatsü': Najmul Hossain

Rongjui/September 15, 2024 (Agencies): Captain Najmul Hossain Shanto-i anir Bangladesh cricket team September 19 nü nungi tenzüka India den Test asaya ana asayatsü lir aser parnok Deobarnü India tonga aruogo.

Mezüngbuba test ya Chennai kübok M. A. Chidambaram Stadium nung asayatsü koba September 23 nü tembangtsü. Tanabuba test ya Green Park Stadium Kanpur nung September 27 nungi October 1 nü tashi asayatsü.

Pakistan den Rawalpindi nung Test asayamung ka 2-0 agi akokba sülen Bangladesh team parnok dak kanga temulung lemteta iba asayamung nung shilem agitsü renema lir.

Najmul Hossain Shanto-i ashiba agi, team nükjidongji test

asaya anaprongla akoktsü atema lir.

"Asaya anaprongla akoktsü atema asayatsü. Asaya akoktsü atema inyakyimji kanga tongtibang. Onok nükjidongji mapa shitak inyaksüba lir. Onoki onok mapa shitak inyakra takok tajung angutsü takoktsü lir," ta pai airport nung Daily Star dang ashi.

Iba asayamung ya 2023-2025 World Test Championship cycle nung shilem ka lir. World Test Championship rankings nung India-i percentage points 68.52 ngua parnok temaba jenjang nung lir aser Bangladesh-i 45.83 percentage points ngua parnok pezübuba nung lir. Bangladesh team tatamsa 2019 küm India nung test asayaba mapang parnoki asayamung 2-0 agi mekoki

liasü.

"Ranking reprangdangra parnok onok dang nungi temaba jenjang nung lir. Onoki tawa junga asayaogo. Onok nükjidongji anogo pongu kanga junga asayatsü asoshi lir. Result ya tatembangbuba anogo tatembangbuba session nung angur. Onoki anogo pongu junga asayara tatembangbuba session nung team mashi kati asaya akoktsü akok," ta Shanto-i ashi.

Bangladesh Test squad: Najmul Hossain Shanto (c), Mahmudul Hasan Joy, Zakir Hasan, Shadman Islam, Mominul Haque, Mushfiqur Rahim, Shakib Al Hasan, Litton Kumer Das, Mehidy Hasan Miraz, Taijul Islam, Nayeem Hasan, Nahid Rana, Hasan Mahmud, Taskin Ahmed, Syed Khaled Ahmed, Jaker Ali Anik.

HI-i Women's coaching camp atema asayar sangdongogo

Rongjui/September 15, 2024 (Agencies): Hockey India-i Honibarnü national coaching camp atema India tetsür hockey team nung asayar 33 tenüng sangdongogo. Iba camp ya September 15 nungi October 9 nü tashi agitsü.

Camp ya Sports Authority of India (SAI) facility Bengaluru nung agitsü, koba women's Asian Champions Trophy atema team renemshi tetenzüker asütsü. Women's Asian Champions Trophy ya tawa Bihar nung yangluba Rajgir Stadium nung November 11 nungi 20 tashi asayatsü renema lir.

"Women's Asian Champions Trophy atema renemshitsü asoshi taruba National Women's Coaching Camp ya kanga tongtibang asütsü," ta India tetsür hockey team head coach Harendra Singh-i ashi.

"Iba camp ajanga onok tasatem arantgetshitsü aser metongshitsü nüngdaka alibatem metongshitsü asoshi maongka agütsütsü," ta paisa ashi.

India tetsür team tatamsa FIH Hockey Pro League 2023/

24 season nung shilem agiogo, kong parnok London aser Antwerp nung Argentina, Belgium, Germany, aser Great Britain amala team tem den asaya liasü.

Captain Salima Tete aser vice-captain Navneet Kaur na lenisüba nung Harendra tawabangba kübok team-i asayamung tepeyong kanga asayaogo.

Camp nung item asayartemi shilem agitsü:

Goalkeepers: Savita, Bichu Devi Kharibam, Bansari Solanki, Madhuri Kindo

Defenders: Nikki Pradhan, Udita, Ishika Chaudhary, Monika, Ropni Kumari, Mahima Choudhary, Jyoti Chhatri, Preeti

Midfielders: Salima Tete, Marina Lalramnghaki, Vaishnavi Vitthal Phalke, Neha, Jyoti, Edula Jyoti, Baljeet Kaur, Manisha Chauhan, Akshata Abaso Dhekale, Ajmina Kujur

Forwards: Sunelita Toppo, Mumtaz Khan, Lalremsiami, Sangita Kumari, Deepika, Sharmila Devi, Navneet Kaur, Deepika Soreng, Preeti Dubey, Vandana Katariya, Rutuja Dadaso Pisal.

Neeraj Chopra-i cm 1 agi Diamond League final makok



Rongjui/September 15, 2024 (Agencies): India nung nüngtugu javelin throw asayar Neeraj Chopra-i, Deobarnü Brussels nung Diamond League Final nung nület 87.86m atsüba sülen pa tanabuba jenjang nung tembangogo.

Neeraj-i cm 1 agi dang temaba jenjang metongteti liasü. Anderson Peters-i nület 87.87m tsüteta pa temaba jenjang nung liasü. Pai Paris Olympics nunga kanga junga asaya bronze medal ngur liasü.

Kasa mapang nung Germany nung Julian Weber-i nület 85.97m tsüa pa tasembuba jenjang nung tembang. Pezübuba nung Adrian Mardare liasü, shibai nület 82.97m atsü. Japan nung Genki Rodrick Dean-ia nület 80.37m tsüa pa jenjang pongububa nung tetoktepa tembanga liasü. Maneni kasa asaya nung Ukraine nung asayar Arthur Felfner (79.86m) trokbuba nung liasü.

India nung asayar yagi nület mezüngbuba atsüba mapang 86.82m tsüa liasü. Iba sülen pai 83.49m atsü. Neeraj-i nület tasembububa atsüba mapang 87.86m ya tsüteta liasü.

Pai Anderson-i tsüteter aliba tera agi dang memenep aser cm ka agi dang pa dang nungi tajemba liasü.

Iba sülen pezüben aser pongubububa nület atsüba mapang Neeraj-i 85m adena metsütet. Pongubububa atsüba nung pai tasembububa talangba atsü aser iba ajanga pa tanabuba jenjang nung tembanga liasü.

Iba asayamung nung tanabuba jenjang nung tembangba sülen Chopra-i senpet USD 12,000 agizüktsü. Leg 14 asayaba sülen prestigious Diamond League series iba asayamung nung tembangogo.

May 10 aser August 22 nü Doha aser Lausanne nung DL one-day meets asayaba mapang tanabuba jenjang nung tembanga point 14 anguba sülen pa Diamond League final atema qualify süa liasü.

Pai 2022 aser 2023 küm Lausanne leg kokgo aser Eugene, USA nung taoba küm final nung Vadlejh sülen tanabuba jenjang nung tembanga liasü.

INDIA OSANG : Tapak 3 nungi...

PM Modi-i Jharkhand nung sen crore 660 alang...

PM-i, Pradhan Mantri Awas Yojana-Gramin (PMAY-G) kübok beneficiary 32,000 nem sanction letters virtually lemtsü aser ki asütsü atema mezüngbuba instalment sen crore 32 agüja liasü.

Kasa mapang nung pai linük ajunga nungi PMAY-G beneficiary 46,000 nem virtually sabi agüja liasü. Centre-i PMAY-G scheme kübok Jharkhand nung sensakertem atema ki 1,13,400 yanglutsütsü agizükogo, ta PTI-i metetdaksü.

Virtually o jembiba mapang Modi, item project tem ajak atema Jharkhand nung aliba nüburtem nem tenüngsang

agüja liasü. "Mapang ka nungbo terenlok ya linük kübok yimti ishika nung dang liasü. Jharkhand amala state modern development dak sendakba nung atsüngzüka liasü. Ajisüaka 'Sabka Sath, Sabka Vikas' benokba sülen linük tebilemdangba melenshiogo. Tangbo sensaker, Adivasi aser Dalit nungertem linük asoshi kanga tongtibang kümogo. Tetsür, aluyimer aser lanurtem kanga tongtibangsa agir," ta PM-i ashi.

Paisa, India anütoklen rail services atsülangshia aoba sülen iba tesem ajunga kanga kara renloka aotsü, ta ashi.

Congress-i J&K...

"Onok NC den longjemer lir, saka onokbo onok party indang ideology nung inyaksangshir. Onoki kodang sorkar kümteflir onoki CMP ka benoktsü aser onok manifesto nung keta aliba tenangzükbatem ajak benoka inyaksü asoshi jenjang tapet agitsü," ta Solanki-i ashi.

NC aser Congress na election magi tsüngda longjemogo aser Farooq Abdullah-i aniba party ya menden 51 nung tokteptsü aser Congress party menden 32 nung tokteptsü. CPI(M) aser Jammu and Kashmir National Panthers Party (JKNPP) na nem menden kaka agütsüogo aser party anaprongla menden pongu nung külemi tokteptsü.

BILEMDANGANG
"Tangar tamajung bilema nü anogo tesüitemdaksü."